

Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaata allanngortinneqarneranik Inatsisartut inatsisaat nr. 6, 6 juni 2016-imeersoq

(Ilinniarnernik piginnaasalissutaasunillu ingerlatsinernik allanik neqerooruteqarsinnaanermut tunngavissiineq, lærlinginut isumaqatigiissuteqarsinnaanermut immikkut periarfissiineq, atuarfinni sulilluni sungiusarnernut, ileqqoreqqusanut il.il. tunngasunik aalajangersakkanik erseqqissaaneq kiisalu Oqaatsinik Pikkorissarfik pillugu Inatsisartut inatsisaannik atorunnaarsitsineq)

§ 1

Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaat nr. 10, 19. maj 2010-meersoq, kingorna Inatsisartut inatsisaatigu, nr. 3, 4. juni 2012-ikkut allanngortinneqartoq allannguutit makku suliarineqarput:

1. I § 5-imi imm. 5-itut aamma imm. 6-itut ilanngunneqassapput:

“Imm. 5. Qitiusumik inuussutissarsiutinillu ilinniarfiit Naalakkersuisut akuersitereernerisigut Akuerisaasumik inuussutissalerinernik sammiveqartumik ilinniartitsinermut aamma tassunga misilitsinnerit ingerlannerannut suliarinnittussarsiuussinnaavaat.

Imm. 6. Qitiusumik inuussutissarsiutinillu ilinniarfiit Naalakkersuisut akuersereernerisigut ilinniakkat ilaat ingerlariaqqiffiusut assingusut Kalaallit Nunaanni ilinniarfinit neqeroorutaanngitsut neqeroorutigisinnaalissavaat”

2. § 25, imm. 2-mi oqaaseqatigiit pingajuat imatut oqaasertalerneqassaaq:

”Sungiusarluni sulinerit § 10, imm. 4 naapertorlugu tamakkiisumik ilaannakortumilluunniit ilinniarfinni atuaatigalugu sungiusarnertut ingerlanneqarsinnaapput, ilinniartoq sungiusarluni suliffimmik, aamma illoqarfimmi allami ilinniartup najugarinngisaani, neqeroorutigineqartumik itigartitsisimappat.”

3. § 25, imm. 2-mi, oqaaseqatigiit sisamaattut ilanngunneqassaaq:

”Inunnik isumaginninnermi oqartussat tamanna pillugu nalunaaruteqarnerisigut uppersarneqartunik ilinniartup pisuussutiginnngisaanik ilinniartup sungiusarluni sullivissatut innersuunneqartup sungiusarfigisinnaanngisaanik kinguneqartumik inuttut immikkorluinnaq atugaqartoqarpat tamanna pillugu qinnuteqartoqarneratigut Naalakkersuisut oqaaseqatigiit pingajuanni piumasqaatinut immikkut akuersisinnaapput.

4. § 34, imm. 1, imatut oqaasertalerneqassaaq:

”Qitiusumik ilinniarfiit, tak. § 31, imm. 1, tamarmik immikkut siulersuisunit 5-7-inik ilaasortalinnit aqutarineqassapput, taakkualu suliffeqarnermi kattuffiit akornannit toqqarneqartassapput, malittarisassat ilinniarfiit ataasiakkaat ileqqoreqqusaanni aalajangersarneqartut naapertorlugit. Qitiusumik ilinniarfiit ilinniartitsisui aamma

teknikkikkut allaffissornikkullu sulisui, siulersuisuni taaseqataasinnaatitaanngitsumik sinniseqartitsissapput. Taamaattoq qitiusumik ilinniarfik ataasiinnaanngitsumik, sumiiffinnili arlalinni neqerooruteqartarpat, neqerooruteqartarfinnit tamanit sulisut sinniisaannik aalajangeeqataasinnaanani peqataasartussamik siulersuisut ilaqartinneqassapput. Siulersuisunut ilaasortaq siulersuisunut marlunnik amerlanerusunut toqqarneqarsinnaanngilaq. Katiguttoqartillugu, tak. § 33, ilinniarfiit katiguttut siulersuisui piffissami ikaarsaariarfimmi, katiguttoqarnissaanik aalajangiisoqarneraniit ukioq ataaseq tikillugu sivisussusilimmik ingerlagallarsinnaapput, tamatuma kingorna ilinniarfiit katiguttut siulersuisussaannik nutaanik toqqaasoqassaaq, tak. naggat siulleq. Piffissami ikaarsaariarfiusumi ilinniarfiit katiguttut siulersuisui ilinniarfimmu katigutsitsinikkut pilersinneqartumut nutaanik ileqqoreqqusaliorlutillu ulluinnarni suleriaasissaliussapput.”

5. § 34, imm. 2-mi, oqaaseqatigiit pingajuattut, sisamaattut tallimaattullu ilanngunneqassapput:

“Siulersuisuni ilaasortat qassiunissaannik suliffeqarnermi kattuffiit sorliit siulersuisut atuuffissaanni aggersumi toqqaasinnaatitaanissaannik kissaatigineqartut pillugit siulersuisut atuuffiisa naanissaa kingusinnerpaamik ukiumik ataatsimik sioqqullugu siulersuisut Naalackersuisunut ilisimatitsissuteqassapput. Naalackersuisut siulersuisut ilisimatitsissutaasa tiguenerata kingorna piffissap qaammatit pingasut iluanni kissaatigineqartut oqaaseqaateqarfigisinnaavaat. Siulersuisut kissaataat qitiusumik ilinniarfiup malittarisassaasa allanngortinneqarnissaannik pisariaqartitsinermik kinguneqassappata, siulersuisut atuuffiisa naanissaa kingusinnerpaamik qaammatit arfinillit sioqqullugit tamanna pillugu siunnersuummik akuerineqartussanngorlugu Naalackersuisunut nassitsissapput.”

6. § 46 imatut oqaasertalernerqassaaq:

”§ 46. Tunngaviusumik inuutissarsiummik ilinniagaq naammassineqassappat piumasaavoq, ilinniartup aamma suliffeqarfiup ataatsip amerlanerilluunniit akornanni lærlingitut imaluunniit ilinniartinneqarnissamik isumaqatigiissuteqartoqarsimanissaa.

Imm. 2. Lærlingitut imaluunniit ilinniartinneqarnissamik isumaqatigiisummut ilaassapput ilinniakkami sungiusarluni sulinissat ilinniarfimiittarnissallu tamarmik, tassunga ilanngullugit svendinngussalluni misilitsinnerit. Naalackersuisut qitiusumik ilinniarfinnit inuussutissarsiutinulluunniit ilinniarfinnit qinnuteqartoqareerneratigut immikkut akuersissuteqarsinnaapput, ilinniarfik atuarfimmi sulilluni sungiusarnissamut pisariaqartinneqartunik atortoqarpat uppersarsinnaallugulu ilinniartup sungiusarluni sulinera atuarfimmi sungiusarluni sulinermigut naammassisinnaagaa. Ilinniartut atuarfimiittarluni ilinniarnissamik isumaqatigiissuteqanngitsut, matumani atuarfinni sungiusarlutik sulinissaq aamma eqqarsaatigalugu, suliffeqarfimmit akissarsiaqanngitsutut tunngaviusumik inuussutissarsiummik ilinniartutut isigineqassapput.”

Imm. 3. Suliffeqarfiit arlallit isumaqatigiisummut peqataappata, isumaqatigiisummi ersissaaq, ilinniarfimiinnerit sungiusarlunilu sulinerit suut suliffeqarfiit ataasiakkaat peqataaffiginaat.

Imm. 4. Isumaqatigiinnermi suliffeqarfik imminut pisussaaffilersinnaavoq, ilinniartup

ilinniarnerrata ilaa suliffeqarfimmi allami imaluunniit atuarfimmi sungiusarluni sulineq ingerlatikkumallugu.

Imm. 5. Inuutissarsiutinik ilinniartitsinerit Naalakkersuisunit akuerisaasut, lærlingitut ilinniartinneqarnissamilluunniit isumaqatigiissuteqarnissamik piunasaqaateqarfiunngitsut aamma atuaatigaluni sungiusarluni sulineq, imm. 1-4-mi ilaatinneqanngillat.

7. § 61, imm. 1 imatut oqaasertalerneqassaaq:

"Aningaasaliissutit aningaasanut inatsimmi aalajangersarneqartut iluannit, inuutissarsiutinik ilinniartitsinermut tunngasutigut pikkorissartitsinermut atatillugu angalanernut najugaqarnernullu aningaasartuutit matussuserneqarnissaannut, tapiissuteqartoqarsinnaavoq."

§ 2

Inatsisartut inatsisaat aggustip aallaqqaataani 2016-imi atuutilissaaq.

Imm. 2. Oqaatsinik Pikkorissarfik pillugu Inatsisartut inatsisaat nr. 14, 6. November 1997-imeersoq tassunga peqatigitillugu atorunnaarsinneqarpoq.

Imm. 3. Siulersuisut inatsisip atuutilernerani ukiumit ataatsimit sivikinnerusumik suli atuuttussat, ilisimatitsissut § 1, nr. 4-mi taaneqartoq sapinngisamik piaarnerpaamik nassiutissavaat.

Namminersorlutik Oqartussat, ulloq 6. juni 2016



Kim Kielsen